

Kadar jenayah dapat dikurangkan secara drastik jika semua pihak bekerjasama

SINAR
18/12/08
N12

PULAU PINANG - Datuk Seri Abdullah Ahmad Badawi berkata, kadar jenayah di negara ini akan dapat dikurangkan secara drastik jika semua pihak bekerjasama dalam usaha memeranginya.

Tanpa penyertaan masyarakat secara keseluruhannya, usaha kerajaan memerangi jenayah tidak akan mencapai kesan yang dikehendaki, kata Perdana Menteri.

“Semua pihak harus memainkan peranan dan tanggungjawab memastikan persekitaran mereka selamat, aman dan selesa untuk didiami. Apabila negara aman, barulah rakyat boleh maju dan negara akan lebih makmur,” katanya pada sesi soal jawab dengan beberapa pertubuhan masyarakat Cina di Dewan Perhimpunan Cina, di sini semalam.

Pada sesi itu Abdullah mengambil kesempatan untuk menjelaskan mengenai beberapa isu yang menjadi kebimbangan masyarakat itu secara terbuka.

Beliau berkata, selain usaha kerajaan meningkatkan kehadiran polis di kawasan dan negeri yang memerlukan, masyarakat boleh membantu dengan mengukuhkan kembali institusi Rukun Tetangga supaya anggotanya boleh dimobilisasikan untuk menjaga keselamatan kampung atau kawasan penempatan masing-masing.

Menjawab soalan mengenai penglibatan warga asing dalam aktiviti jenayah di negara ini, Abdullah berkata para majikan bertanggungjawab memberitahu pekerja asing mereka supaya mematuhi undang-undang dan peraturan di negara ini.

“Majikan juga perlu menerangkan tentang sensitiviti masyarakat di negara ini supaya apabila kumpulan itu datang bekerja di sini mereka akan mempunyai gambaran yang jelas tentang negara, rakyat dan adat resam kita,” katanya.

Perdana Menteri juga berkata, kerajaan sentiasa menghormati kepelbagaian buda-

ya, kaum dan agama rakyat di negara ini yang menjadi aset kepada perpaduan dan keharmonian kaum.

“Kita sentiasa meraikan aset ini, dan tidak pernah terlintas untuk meminggirkan mana-mana budaya dan agama sesuatu kaum. Oleh sebab itu kerajaan sentiasa mengadakan rumah terbuka sempena perayaan setiap kaum,” katanya.

Pada majlis itu kira-kira 1,000 orang hadir, walaupun pada awalnya Perdana Menteri dijangka akan berdialog dengan kumpulan yang kecil sahaja.

- BERNAMA

